

## Մանկական «Ծտի պսակ» երաժշտաժիսական ներկայացում

Մաներից երկուսը ծտերի տիկնիկներով խաղում են, մեկի տիկնիկը տղա է, մյուսինն՝ աղջիկ: Նրանցից մեկը մյուսին հարցնում է.

- Քո տիկնիկի անունն ի՞նչ է:
- Ծըլվըլիկ, բա քոնի՞ անունն ինչ է:
- Ճըլվըլիկ:
- Կգա՞ս ծտի պսակ խաղանք:
- Կգամ, արի խաղանք:

**Միասին երգում են.**

Պսակ-պսակ, տիկնի պսակ,  
Էկեք խաղանք տիկնի պսակ,  
Տիրնանինե, տիրնանինե,  
Զուռնի ձենը գեղով մին է...

Մասնակիցները բաժանվում են երեք խմբի՝ նվագաձուներ, հարսնացուի կողմի խնամիներ, տղայի կողմի խնամիներ:

Խնամիները կանգնում են իրար դիմաց ու երգում.

### Այլիհո՛

- Էկանք, էկանք, այլիհո՛,
- Ինչու՞ եկաք, այլիհո՛,
- Աղջկատեսի, այլիհո՛,
- Աղջիկ չունենք, այլիհո՛,
- Տեսել ենք, տեսել, այլիհո՛,
- Որտե՞ղ եք տեսել, այլիհո՛,
- Ձեր այգու մեջ, այլիհո՛,
- Ի՞նչ էր անում, այլիհո՛,
- Թե՛լ էր մանում, այլիհո՛,

- Ի՞նչ կար գլխին, այլիհո՛ւ,
- Կապույտ լաշակ, այլիհո՛ւ,
- Ի՞նչ կար մեջքին, այլիհո՛ւ,
- Արծաթ գոտի, այլիհո՛ւ,
- Ի՞նչ կար ոտին, այլիհո՛ւ,
- Կարմիր մաշիկ, այլիհո՛ւ,
- Բա ո՞նց եկաք, այլիհո՛ւ,
- Պոստ գառով, այլիհո՛ւ,
- Պոչատ հավով, այլիհո՛ւ,
- Տասիս տասի ծակված թավով, այլիհո՛ւ :

### **Աղջկա կողմից բացականչում են.**

- Պա՛հ, պահ, պահ, պահ, պոստ գառո՛ւ վ, պոչատ հավո՛ւ վ... դատարկ ձեռով ո՞ւր եք եկել:
- Գիտեն՝ դուրսը դրած աղջիկ ունենք:

### **Աղջկա մայրը գովում է իր աղջկան.**

- Էսպես աղջիկ ո՞ւ վ ունի,  
 Շորերով շապիկ ունի,  
 Մարգրտով կոշիկ ունի,  
 Մեյդանը հարսնիք ունի:

### **Տղայի մայրն է գովում իր տղային.**

- Տղա ունիմ, բեղերով,  
 Հարս կբերե քողերով,  
 Կանաչ վառած մոմերով,  
 Մերը կելնի խունկերով,  
 Հերը կելնի փնջերով.  
 Հանդի լալա իմ տղեն,

Աչքը խումար իմ տղեն,  
Բոյը չինար իմ տղեն:

### **Ծվլիկի (հարսիկի) տիկնիկով երեխան.**

- Կլորիկ ու թմբիկ եմ,  
Պստլիկ ու ճստլիկ եմ,  
Քիթս պուճուր – պուճուրիկ է,  
Աչուկներս սևուլիկ են,  
Կա՞ ինձ նման սիրունիկը:

Բոլորը միասին՝  
- Չկա՛, չկա՛, չկա՛:

### **Ճլվլիկի (փեսայի) մայրը.**

- Ալ խնձորի իմ տղեն,  
Կանաչ թզնի իմ տղեն,  
Կարմիր նոնի իմ տղեն,  
Բոյը չինար իմ տղեն:

### **Հարսի մայրը.**

- Աղջիկ ունիմ օղերով,  
Հարս պիտ անիմ քողերով,  
Աղջիկ ունիմ հարսնացու,  
Կտրիճ կուզիմ փեսացու:  
Ո՞րին տամ, ո՞րին չտամ:

### **Փեսայի կողմի խնամիները.**

- Մեր ճրվլիկին տուր:

**Հարսի մայրը.**

- Տա՛մ, թե՛ չտամ:

**Փեսայի կողմի խնամհները.**

- Տո՛ր, տո՛ր, լավ տղա է:

**Կողքից մեկն ասում է.**

- Սպասե՛ք, բա չիմանա՞նք՝ հարսն ում է ուզում:

**Երգում են «Վեր, հա վեր, վեր» երգը**

Վեր, հա վեր-վեր, վերիկ է,  
Վերն օր ասես՝ էնիկ է,  
Վեր, հա վեր-վեր, վերիկ է,  
Վերն օր հավնիս՝ էնիկ է:

Աչքեր ունես՝ նրռան հատ,  
Վեր, հա վեր-վեր, վերիկ է,  
Կապտածաղիկ կըտավհատ,  
Վերն, օր ասես էնիկ է,  
Էրնեկ թե մերըդ բերեր,  
Վեր, հա վեր-վեր, վերիկ է,  
Քեզ պես աղջիկ քանիմ հատ,  
Վերն օր հավնիս՝ էնիկ է:

**Հարսի մայրը.**

- Լավ, ում որ կուզի, նրան կտամ:

**Հարսիկի տիկնիկը ձեռքին աղջիկը գնում կանգնում է փեսայի տիկնիկը բռնած տղայի կողքին:**

**Միասին երգում են «Պսակ, պսակ», «Այ ֆռոկա» երգերը**

Պսակ-պսակ, տիկնի պսակ.

Փեսեն էկավ՝ լիքը քսակ –  
Տիրնանինե, տիրնանինե,  
Զուռնի ձենը գեղով մին է...

Բոյը՝ չինար, մեջքին՝ քամար,  
Աչքերը՝ ծով, ունքը՝ կամար –  
Տիրնանինե, տիրնանինե,  
Զուռնի ձենը գեղով մին է...

### Այ ֆոռկա

Այ ֆոռկա, ֆոռկա, ֆոռկա,  
Էսօր մեր տուն հարսնիս կա,  
Էսօր մեր տուն հարսնիս կա,  
Կոլոտ փեսին բեղ չկա:

Այ ֆոռկա, ֆոռկա, ֆոռկա,  
Էսօր մեր տուն հարսնիս կա,  
Թավեն ծակ է, եղ չկա,  
Փեսեն էկավ՝ տեղ չկա:

Այ ֆոռկա, ֆոռկա, ֆոռկա,  
Էսօր մեր տուն հարսնիս կա:

**Աղջիկները շրջապատում են Ծըլվըլիկի տիկնիկին (փնջատուն), մի կողմ են տանում ու գովում.**

Աղջկե՛ք, պար բռնեցեք,  
Ծըլվըլի երես գովեցեք:  
Ա՛յ երես, շարմաղ երես,  
Դու մեզ չթողնես սևերես:

Աղջկե՛ք, պար բռնեցեք,

Ծըլվըլի աչեր գովեցեք:  
Ա՛յ աչեր, սիրուն աչեր,  
Արևի պես փայլուն աչեր:

**Տղաների խումբը, որը շրջապատել է տղայի տիկնիկին, գովում է.**

Ջա՛ն, տղե՛ք, պար բռնեցեք,  
Ճըլվըլի կոներ գովեցեք:  
Ա՛յ կոներ, ուժեղ կոներ,  
Դուք կշարժեք մեծ-մեծ լեռներ:

Ջա՛ն, տղե՛ք, պար բռնեցեք,  
Ճըլվըլի հասակ գովեցեք:  
Ա՛յ հասակ, բարձր հասակ,  
Քեզ կվայելե դափնեպսակ:

**Տղաները միանում են աղջիկներին ու միասին երգում.**

Աղջի, ինչ լավ նազ ունիս,  
Ծըլվըլին գովելու համար ենք եկել,  
Չորեք դիմաց մազ ունիս,  
Ծըլվըլին տանելու համար ենք եկել:

Խունջիկ-մունջիկ մի անի,  
Ծըլվըլին գովելու համար ենք եկել,  
Մեր տուն գալու կամ ունիս,  
Ծըլվըլին տանելու համար ենք եկել:

Ծըլվըլին գովելու համար ենք եկել,  
Ծըլվըլին տանելու համար ենք եկել:

**Մասնակիցներից մեկը երգում է «Ծառս ծաղկեցավ», «Եկեք, տեսեք, ծառն է ծաղկեր» երգերը**

Ծառու ծաղկեցավ, ծաղկեցավ, ծառ կայնեցավ,  
Կանաչ ու կարմիր՝ մեր թագավորն էր:

Ծաղիկ բացվեցավ, բացվեցավ, վառ ծաղկեցավ,  
Անթառամ ծաղիկ՝ մեր թագուհին էր:

1. Եկեք, տեսեք, ծառն է ծաղկեր,  
Եկեք, տեսեք, ծառն է ծաղկեր,  
Ծաղիկն ու արևն են վրրան,  
Արևն ու ծաղիկն են վրրան:

2. Երբ նռնենուն ծառն, որ ծաղկի,  
Երբ նռնենուն ծառն, որ ծաղկի,  
Արևդ անոր նըման ծաղկի,  
Ծաղիկդ անոր նըման ծաղկի:

**Բոլորը միասին.** - Հարսը փեսին հալալ է:

**Գալիս է տերտերը**

Պսակ, պսակ, տիկնի պսակ, արջի քուլու, դեղին դմակ,  
Կուժն ու կուլեն գլխիդ կոտրեմ, տեր ես, թե՛ չէ:

**Փեսան**

– Տե՛ր եմ:

**Բոլորը միասին բացականչում են.**

– Տե՛ր է՛:

**Տերտերը**

Պսակ, պսակ, տիկնի պսակ, արջի քուլու, դեղին դմակ,

Կուժն ու կուլեն գլխիդ կոտրեմ, հնազանդ ես, թե՛ չէ:

### **Հարսը**

– Հնազանդ եմ:

### **Բոլորը միասին բացականչում են.**

– Հնազանդ է՛:

### **Միասին երգում են «Ծառ ծաղկեցավ» երգը:**

Սուրբ Կարապետա օրհնութենով, օրհնութենով  
Ծառս ի ծաղկեցավ, ծառս ի ծաղկեցավ,  
Ծառ ծաղկեցավ, ճյուղ բազմեցավ՝  
Կանաչ ու կարմիր:

### **Միասին երգում են.**

Ադեն մաճուն մերել է,  
Փեսի փայր պահել է,  
Անտեր մնա չալ կատուն,  
Կերավ փեսի փայ մաճուն:

Թավեն ծակ է, եղ չկա,  
Փեսեն էկավ, տեղ չկա,  
Փեսին շատ երես միք տա,  
Փեսին էյթիբար չկա:

### **Բարեմաղթանքներ, որոնք հղում են մեծերը, փոքրերը**

✓ Ձեր տուն մտնի հազար բարի,  
Հաճար, ցորեն, կորեկ, գարի,  
Լիքը հորեր շատ ունենաք,  
Կարմիր օրեր շատ ունենաք,



Կարմիր օրով, կարմիր շորով,  
Ուրախ կենաք՝ լիքը տնով:

- ✓ Կարասն ձեր լցվի գինով,  
Եվ տունը ձեր՝ շեն բարիքով:
- ✓ Տաշտներդ լի հաց լինի,  
Դրոներդ միշտ բաց լինի:

### **Պարերգ – Հաց կթխեմ գարի ա**

1. Հաց կթխեմ, գարի ա,  
Երի, երի, երվա, օ՛յ, օ՛յ,  
Էս ինչ ուրախ տարի ա,  
Շեկո ջան, երվա, օ՛յ, օ՛յ:
2. Ծով ա դառե մեր դաշտը,  
Երի, երի, երվա, օ՛յ, օ՛յ,  
Լիքը հաց ա մեր տաշտը,  
Շեկո ջան, երվա, օ՛յ, օ՛յ:
3. Հաց եմ թխել մշակին,  
Երի, երի, երվա, օ՛յ, օ՛յ,  
Հոտ քաշել մանիշակին,  
Շեկո ջան, երվա, օ՛յ, օ՛յ:
4. Հաց կթխեմ, գարի ա,  
Երի, երի, երվա, օ՛յ, օ՛յ,  
Կաքավները մավի ա,  
Շեկո ջան, երվա, օ՛յ, օ՛յ:

**Բարեմաղթանքներ՝**

- ✓ Ծլեք, ծաղկեք, գորանաք:
- ✓ Օրհնվեք, ձեր օջախը շեն մնա, ձեր մինը հազար դառնա:
- ✓ Ոտքերդ քարին չդիպչի, երկար արև ձեզ:
- ✓ Ծաղկեք, ծլեք, ծիր-ծիրանի դառնաք:

**Բարեմատթանքներ**

Օրհնվեք, ձեր օջախը շեն մնա, ձեր մինը հազար դառնա:

Շեն մնաք, ծլեք, ծաղկեք, գորանաք:

Տաշտներդ լի հաց լինի,

Դրոներդ միշտ բաց լինի:

Օրհնյալ լինեք, յոթը որդով սեղան նստեք:

Մի բարձի ծերանաք, մուրազներիդ հասնեք:

Հիվանդություն թող չլնի, ապրեք շատ ու շատ տարի:

Ոտքերդ քարին չդիպչի, երկար արև ձեզ:

Չոլը գնաք՝ կանաչ դառնա:

Աստծո աջը ձեր գլխից անպակաս լինի:

Ջրի նման երկար կյանք ունենաք, ուրախ օրով ծերանաք:

Օրհնյալ է Աստծո օրհնանքը, Աստծո խաչը միշտ ձեր վրա լինի:

Բախտավոր ապրեք, ձեր տան ծուխը չկտրվի:

Երկար արև լինեք, մազերդ չծովի:

Մն օր չտեսնեք, հող ցանեք, ոսկի հնձեք:

Օրհնվի ձեր յոթը պորտը:

Ծաղկեք, ծլեք, ծիր-ծիրանի դառնաք:

////////////////////////////////////

Իմ աղջկա աչքերը

Նմանի ժամի խաչերը,

Իմ աղջկա բերնարը

Նմանի ժամի խորնակը:

Քանց բարունակ էլնես ճղով,  
Քանց բարդի ծառ էրկեն բաժով,  
Բաժրդ կանանչ, կանանչ – մանանչ:

Սառն աղբրի շվաք է,  
Մութ գիշերվա ճրագ է,  
Տերնդեզի կրակ է,  
Ծառի ծերի վարդ է,  
Ծառի ծերի ճուղեն է,  
Մեղրատանձի ճյուղեն է: